

Nasional



Gambar fail, Yee Wei menunjukkan anak harimau putih, Sam dan Elsa yang dilahirkan di Taman Hidupan Liar, Sunway Lagoon pada 2017.



Yee Wei berkongsi pengalaman bertugas menjaga haiwan kepada pengunjung.

(Foto Zulfadhl Zulkifli/BH)

Pengalaman bidan harimau suntik semangat terus kerjaya

Doktor veterinar pikul tugas mencabar jaga 140 spesies haiwan liar, jinak dalam bidang didominasi lelaki

Oleh Nor Hatina Shuib
hatina@bh.com.my

Petaling Jaya: Pengalaman menjadi 'bidan' menyambut kelahiran bayi harimau pada 2017, menyuntik semangat doktor veterinar, Eve Foong Yee Wei, 32, meneruskan kerjayanya dalam bidang kurang dipelopori wanita di negara ini.

Ketika itu hanya beliau seorang bertugas di Taman Hidupan Liar, Sunway Lagoon, tugasannya lebih mencabar kerana bukan hanya menyambut kelahiran, malah terpaksa menjaga bayi berkenaan selama satu bulan setengah.

Tugas tambahan katanya,

termasuk memastikan anak harimau disusukan setiap dua jam selain perlu tidur di klinik kawasan taman tema di situ.

"Secara alami harimau tidak tahu menjaga anak selepas bersalin. Mungkin juga disebabkan kelahiran anak pertama, ibunya tiada pengalaman mengawasi dan menjaga anak sendiri, jadi saya memainkan peranan sebagai 'ibu' sementara ibu harimau pulih dan kembali sihat selepas melahirkan," katanya.

Wanita tinggi lampai ini turut berhadapan cabaran mengangkat haiwan seberat ratusan kilogram (kg) seperti lembu, kambing, beruang mahupun singa. Tugasannya dilakukan ketika ketika hendak menjalani pembedahan.

Yee Wei berkata, beliau tidak pernah mengeluh ketika berhadapan kerennah makhluk istimewa ini, sebaliknya gembira melihat semua haiwan sihat dan bersosial dengan baik.

"Setakat ini saya menjaga 140 spesies haiwan liar dan jinak membabitkan 650 haiwan keseluruhan," katanya.

Tugasannya yang perlu digalas termasuk memastikan semua hai-

wan sihat, menjaga diet setiap spesis, memberi vaksin, menentukan kesesuaian tempat tinggal supaya mereka tinggal dengan selesa.

Graduan perubatan veterinar Universiti Putra Malaysia (UPM), berkata spesies seperti harimau, singa putih, harimau kumbang dan beruang matahari antara haiwan bawah penyeliaannya dengan dibantu penjaga zoo.

Pada masa sama juga, beliau turut menjaga kebajikan haiwan jinak lain seperti burung, arnab dan haiwan seperti rusa dan kuda.

Setiap hari, Yee Wei bertugas enam hari seminggu dari jam 9 pagi sehingga 5 petang, namun atas rasa tanggungjawab terhadap keperluan haiwan di taman tema di sini, beliau biasanya pulang lewat bagi memastikan semua haiwan berada dalam keadaan selesa.

"Saya perlu utamakan keperluan haiwan kerana ada masanya ia tiba-tiba mahu melahirkan atau sakit pada waktu malam."

"Sebagai doktor veterinar, saya perlu sentiasa berhadapan situasi cemas dan bersedia menghadapi apa sahaja kemungkinan," katanya.

Katanya, haiwan juga mengalami perubahan emosi, selain me-

nentukan diet, nutrisi, vaksin dan kumpulan sosial setiap spesies, dia perlu memahami emosi mereka.

"Ini antara cabaran kerana mereka tidak menunjukkan rasa sakit. Jadi, saya perlu peka akan perubahan kelakuan dan sifat haiwan di sini."

"Pemerhatian penting supaya haiwan ini berada dalam keadaan sihat dan segera jalani rawatan jika mereka bergaduh sesama sendiri."

"Walaupun sama spesies, karakter setiap haiwan berbeza, kami perlu sensitif akan perubahan setiap daripada mereka. Penelitian termasuk memeriksa fizikal penting bagi mengelak jangkitan penyakit," katanya.

Anak bongsu dua beradik ini berkata, walaupun pembabitan wanita dalam bidang ini tidak serancak lelaki, golongan hawa kini dilihat sudah mula aktif dalam bidang ini.

Katanya ini masih masih didominasi lelaki, namun tidak dinafikan sifat wanita yang lebih prihatin akan perubahan emosi haiwan membolehkan mereka menjalankan tugas penuh dedikasi.

Kerjaya doktor veterinar masih didominasi lelaki, namun tidak dinafikan sifat wanita yang lebih prihatin akan perubahan emosi haiwan membolehkan mereka menjalankan tugas penuh dedikasi.

**Eve Foong Yee Wei,
Doktor veterinar**

"Kerjaya ini sesuai untuk wanita kerana sifat semula jadi mereka yang penyayang," katanya yang perlu berhadapan dalam situasi tidak selesa termasuk najis, darah haiwan dan gangguan ulat.

"Pada masa sama tidak dinafikan, setiap kali berhadapan tekanan tugas, saya selesa melawat kandang dan memerhatikan gelagat haiwan ini, pastinya memberi ketenangan."

"Malah berkomunikasi dengan mereka juga sebahagian daripada terapi tenangkan fikiran," katanya yang mengharap masyarakat perlu sentiasa peka akan usaha melindungi hidupan liar sempena Hari Haiwan Antarabangsa yang disambut setiap tahun pada 4 September."